

## 費文憲公

相國費文憲公，事父甚謹。中狀元後，猶奔走服勞於父旁，不命之坐，不敢坐。在翰林時，與關中某公同事，又且同年，兩人對奕爭勝，戲擊其頰，某公不悅，然絕不見於言，第自疏闊耳，公悔。日至其門，長跪請罪，某公終不出。不知誰氏以其事聞於其父，父大怒，封號一竹板，自家發至京師，命公自扑，公於是持父所責之書，并竹板，登某公之堂，自扑者三次，某公始出，抱首而哭。公曰：罪誠在我，何爲哭？曰：公尙有父督責公，我求督責我者，不可得也，是以哭耳！自是相驩如平生。

嘗讀史，見身居顯位，年已過中，而懷受母杖，杖畢，具衣冠，再拜恭謝者有矣，未有越數千里，遙接父書，懷遵父命，受杖唯謹如費公者，即此一節可以見公矣！某公謂公尙有父督責公，我求其督責我者，而不可得，痛哉言乎！中孚每閱至此，未嘗不嗚咽終日。嗟乎！安得起吾父於九京，而使不孝<sub>中孚</sub>得蒙繩束，享有督責之樂耶！

## 王心齋

王心齋先生本泰州鹽戶，其父以戶役蚤起赴官，方急取冷水盥面，先生見之，痛傷曰：我爲人子，而使父如此，何用子爲？遂請以身代役，自是於溫

清定省之禮，行之益謹。嘗著孝弟箴云：事親從兄，本有其則，愛之敬之，務至其極。愛之深者，和顏悅色；敬之篤者，怡怡侍側。

心齋先生有父，故得以服勞定省，此先生之幸也！

### 陳雲達

陳雲達事親甚篤。一日因親瑣繁，不覺有忿色，既而自悔曰：愉色之謂，何而我乃爾乎？亟向親叩謝服罪，退而又自懲自責，若無所容。自是一意婉愉，終其身無復亢厲。

諺云：孤犢觸乳，驕子詈母，中孚少孤失教，為母所驕，每多觸忤，省事之後，雖嘗慚悔力改，而愉婉之實，終覺有愧，此恨之尤者！

### 李霖雨

孝廉李霖雨，會試都門，以離親日久，思之不置，乃齋心發願，誓告於神，血誠悔罪，籲天鑒照，務矢歸家順親，凡母意念所加或默相拂，母教訓所及或明相違者神殛之。

子之於親，必無拂無違，而後親心豫。汝中孚稚時，其相拂相違者何限，神雖未即明殛，未嘗